



歷代帝王
宅京記

光緒戊子冬校刊何步治題

為鑑於古者效法之有在也

宅京言

歷代帝王宅京記序

歷代帝王宅京記序

自古帝王維繫天下以人和不以地利而卜都定鼎計及萬世必相天下之勢而厚集之周之盛也元公營洛以備時巡而豐鎬之故都未之有易洎乎宣幽王靈不替至於平王舉祖宗之故地而棄之秦黍離之所以降為主風也柳子厚謂周之亡久矣徒建空名於諸侯之主耳夫以文武成康功德之在人宜若設險守國可以無庸而大勢一失不能復振豈非得全者昌失全者亡古之帝者必居上游其以此哉漢婁敬之言賴張良力贊成之唐武德中遣使按行樊鄧將徙都焉因秦王之諫而止宋都大梁謀徙而弗果也太祖曰不出百年天

下民力竭矣其後果致偏安有識之士謂明成祖不遷
北平則南都未可以二百四十年而無事由是言之天
下之勢自西而東自北而南建瓴之喻振古如茲於今
爲烈矣舅氏亭林先生天授高才繼古人絕學當明之
末欲有所樹立迄不得試乃退著書以自見有曰肇域
志者囊括一統志二十一史及天下府州縣之志書而
成者也繼又摘其有關政事者爲天下郡國利病書而
復彙從來京都沿革之故參互考訂輯成是編共二十
卷名曰歷代帝王宅京記夙嘗請之而未肯出諸笥也
歲之壬戌先生捐館簡閱遺書則是編存焉念曩者
大廷對策謬荷 先帝國士之知先生助語必有體國

經野之心而後可以登山臨水必有濟世安民之識而
後可以考古論今元文雖不敏請事斯語迄今三十年
未之敢忘茲者恭膺 天眷承乏綸扉常恐有負先生
之教下負所學卽上負 聖朝因不揣固陋序而歸諸
其嗣嗚呼在德不在險自古言之而冀都好風水之說
顧出自朱子則先生是編固俟後聖而不惑也夫崑山
徐元文謹序

卷之十 成都

卷之九 雒陽下

卷之八 雒陽中

卷之七 雒陽上

卷之六 關中四 太皇 大皇

卷之五 關中三

卷之四 關中二 關中

卷之三 關中一

卷之二 總序下

卷之一 總序上 入京 會審 關中

歷代帝王宅京記目錄

卷之一 總序上

卷之二 總序下

卷之三 關中一

卷之四 關中二

卷之五 關中三

卷之六 關中四

卷之七 雒陽上

卷之八 雒陽中

卷之九 雒陽下

卷之十 成都

卷之十一 鄴上

卷之十二 鄴下

卷之十三 建康

卷之十四 雲中

卷之十五 晉陽 太原 大名

卷之十六 開封

卷之十七 宋州 臨安

卷之十八 臨潢

卷之十九 幽州

卷之二十 遼陽 大定 會甯 開平

歷代帝王宅京記卷一

槐廬叢書

崑山顧炎武著

吳縣朱記榮校刊

總序上

伏羲氏都于陳今河南開封府陳州有太昊陵

春秋傳曰陳太昊之虛也

神農氏初都陳後居曲阜司馬貞三皇本紀註曰按今淮陽有神農井又左傳魯有大庭氏之庫是也

山東兗州府曲阜縣

水經注曰陳城故陳國也伏羲神農並都之城東北

三十許里猶有羲城實中

黃帝居軒轅之邱山海經曰在窮山 邑于涿鹿之阿今

隸保 安州遷徙往來無常處以師兵為營衛

漢郡國志上谷郡涿鹿縣引帝王世紀曰黃帝所都
有蚩尤城阪泉黃帝祠 水經注曰魏土地記曰下
洛城東南六十里有涿鹿城城東一里有阪泉泉上
有黃帝祠晉太康地理記曰阪泉亦地名也泉水東
北流與蚩尤泉會水出蚩尤城城無南面魏土地記
稱涿鹿城東南六里有蚩尤城泉水淵而不流霖雨
則流注東北入涿水

少昊自窮桑登帝位 在魯城北居曲阜 今曲阜縣有少昊陵

春秋傳曰封伯禽于少皞之虛 註少昊虛曲阜也在魯城內劉楨魯都賦

昔大庭氏肇建厥居少昊受命亦都茲焉

顓頊都帝邱 今山東東昌府濮州

春秋傳曰衛顓頊之虛也故為帝邱 註衛今東郡濮陽縣昔帝顓頊

居之其城內有顓頊冢 皇覽曰顓頊冢在城門外廣陽里中

帝嚳都亳 今河南河南府偃師縣

水經注曰亳本帝嚳之墟在禹貢豫州河洛之間今

河南偃師城西二十里尸鄉亭是也

堯都平陽 今山西平陽府臨汾縣

五子之歌曰維彼陶唐有此冀方 孔安國傳冀州堯所都

春秋傳曰吳公子札觀樂為之歌唐曰思深哉其有

陶唐氏之遺民乎

後漢郡國志曰河東郡平陽侯國有鐵堯都此 應劭曰在

平陽之陽

舜都蒲坂 今山西平陽府蒲州 皇甫謐曰舜所都或言蒲坂或言平陽或言潘潘今上谷媯州城

禹都安邑 今山西平陽府解州安邑縣 郡縣志夏縣東北十五里安邑故城禹所都也 皇甫謐曰都平陽或在安邑或在晉陽

服虔曰唐虞夏之都大率相近不出河東之界

湯居亳

書序曰自契至于成湯八遷湯始居亳從先王居

契父帝嚳都亳湯自商邱遷焉故曰從先王居 履祥曰唐虞以上無王稱且契非嚳子借使嚳子不 宜謂嚳先王也先王者必指 元王此商人追稱之辭也

漢書地理志曰河南郡偃師殷湯所都 皇覽曰偃師有湯亭有湯

祠

書立政三亳皇甫謐曰蒙為北亳穀熟為南亳偃師

為西亳 詩元鳥正義曰亳地在河洛之間書序註云今屬河南偃師地地理志河南郡有偃師縣有

尸鄉殷湯所都皇甫謐云學成以爲亳在河洛之間今河南偃師西二十里有尸鄉亭是也謐考孟子

稱湯居亳與葛為鄰按地理志葛今梁國甯陵之葛鄉是也湯地七十里耳葛伯不祀湯使亳衆為之耕

有童子餉食葛伯奪而殺之古文仲虺之誥曰湯征自葛始計甯陵去偃師八百里而葛南亳在穀熟之

子餉食非其理也今梁國自有二亳南亳在穀熟之地北亳在蒙地非偃師也書序曰盤庚五遷將治亳

殷即偃師是也然則殷有三亳二在梁國一在河洛之間穀熟為南亳即湯都也蒙為北亳即景亳是湯

所受命也偃師為西亳即盤庚所徙者也立政之篇曰三亳阪尹是也如謐之言非無理矣鄭必以亳為

尸鄉者以地理志言尸鄉為殷湯所都舊說為然故從之也且中候格予命云天乙在亳東觀在洛若

亳在梁國則居于洛東不得東觀于洛也所言三亳阪尹謂其尹在阪謐之所言三亳其地非皆有阪故

立政註云三亳者湯舊都之民分爲三邑其長居險故云阪尹蓋東成皋南轅轅西降谷也是鄭以三亳

為分毫民于三處非三處有毫地也杜預以景毫為周地河南壽縣西南有湯亭或說卽偃師也漢書音義曰臣瓚按湯居亳今濟陰薄縣是也今薄有湯冢已氏有伊尹冢皆相近又以亳為濟陰薄縣以其經無正文故各為異說也

括地志曰宋州穀熟西南三十五里南亳故城卽湯都北五十里蒙城為景毫湯所盟也因景山為名河南偃師為西亳帝嚳及湯所都盤庚所遷亳邑故城在偃師縣西十四里

仲丁遷于鄕音敖史記作傲書正義曰李願云鄕在

河北也或曰今河南敖倉二說未知孰是括地志曰

榮陽故城在鄭州榮澤縣西南殷時敖地也周時名北

河直甲居相書傳曰在河北括地志曰故殷城在相

州內黃縣東南史記項羽與章邯期涇

水南殷虛上今河

南彰德府安陽縣

祖乙圮于耿水經注曰汾水又西逕耿鄉城北故殷都

也帝祖乙自相徙此為河所毀故書序曰祖乙圮于耿

後漢郡國志曰河東郡皮氏有耿鄉史記正義曰

括地志云絳州龍門縣東南十二里耿城故耿國也今

山西平陽府蒲州河津縣史記作邢索隱曰邢音耿

近代本亦作耿

盤庚遷于殷

史記曰帝盤庚之時殷已都河北盤庚渡河南復居

成湯之故居水經注曰陽渠又東逕亳殷南昔盤

庚所遷改商曰殷此始也

書五邦括地志曰湯自南亳遷西亳仲丁遷鄕河直甲居相祖乙居耿盤庚渡河南居西亳是五遷也釋

文馬氏曰五邦謂商邱毫蹕相耿

武乙徙朝歌今河南衛輝府汲縣

史記曰武乙立殷復去亳徙河北

又曰昔唐人都河東殷人都河南周人都河南夫三

河在天下之中若鼎足王者所更居也

漢書地理志曰河內本殷之舊都周之滅殷分其畿

內為三詩國風邶庸衛國是也邶以封紂子武庚庸

管叔尹之衛蔡叔尹之以監殷民謂之三監

後漢郡國志曰朝歌紂所都居南有牧野北有邶國

水經注曰朝歌城本沫邑詩云爰采唐矣沫之鄉矣

殷王武乙始遷居之為殷都也有糟邱池池城內有

鹿臺紂自投于火處 竹書紀年曰武王親禽帝受

于南單之臺蓋鹿臺之異名也

詩譜云邶鄘衛者商紂畿內方千里之地其封域在

禹貢冀州太行之東北踰衡漳東及兗州桑土之野

周武王伐紂以其京師封紂子武庚為殷後庶殷頑

民被紂化日久未可以建諸侯乃三分其地置三監

使管叔蔡叔霍叔尹而教之自紂城而北謂之邶南

謂之鄘東謂之衛

周太王居于岐山今陝西鳳翔府岐山縣

史記曰后稷封于邰徐廣曰今濠鄉在扶風正義曰括地志云故濠城一名武功

城故邰國公劉居豳正義曰括地志云豳州新平古公遷

岐

詩曰古公亶父來朝走馬率西水滸至于岐下

孟子曰大王居邠狄人侵之去之岐山之下居焉

文王作豐

括地志曰周豐宮在雍州鄠縣東今陝西西安府鄠縣

詩曰文王受命有此武功既伐于崇作邑于豐

武王宅鎬

括地志曰鎬在雍州西南二十五里今陝西西安府

咸陽縣西南二十五里皆在長安南

詩曰考卜維王宅是鎬京維龜正之武王成之水經注曰

渭水上承鎬池于昆明其北周武王之所都也自漢武帝穿昆明池于是地基構淪褫今無可究

既克商遷九鼎于雒邑

今河南河南府雒陽縣

史記曰武王至于周自夜不寐周公旦即王所曰曷

為不寐王曰告女維天不饗殷自發未生于今六十

年麋鹿在牧蜚鴻滿野天不享殷乃今有成維天建

殷其登名民三百六十天不顯亦不賓滅以至今索隱

曰言殷家不大光昭亦不即擯滅以至于今我未定天保何暇寐王曰定

天保依天室悉求夫惡貶從殷王受日夜勞來我西

土我維顯服及德方明氏維汭延于伊汭居易毋固

其有夏之居徐廣曰夏居河內初我南望三塗北望

嶽鄙索隱曰杜預云三塗在陸渾南嶽蓋顧詹有河

粵詹雒伊毋遠天室營周居于雒邑而後去

武王使召公相宅

召誥曰惟二月既望

傳曰周公攝政七年二月十五日

越六日乙未

王朝步自周則至于豐惟太保先周公相宅越若來三月惟丙午朏越三日戊申太保朝至于洛卜宅厥

既得卜則經營傳曰其已得吉卜則經營規越三日

庚戌太保乃以庶殷攻位于洛傳曰以衆殷之民

水北今河南南城也在越五日甲寅位成若翼日乙卯

周公朝至于洛則達觀于新邑營越三日丁巳用牲

于郊牛二越翼日戊午乃社于新邑牛一豕一

越七日甲子周公乃朝用書命庶殷侯甸男邦伯厥

既命庶庶庶殷丕作

洛誥曰周公曰予惟乙卯朝至于洛師我卜河朔黎

水我乃卜澗水東灑水西惟洛食傳曰我卜河北黎水上不吉又卜澗

灑之間南近洛吉今河南城也卜我又卜灑水東亦

必先墨畫龜然後灼之兆順食墨

惟洛食傳曰今洛陽也將定下俾來以圖及獻卜傳

遺使以地圖及獻所又曰戊辰王在新邑傳曰以十

又曰戊辰王在新邑傳曰以十二烝祭歲文王駢牛

一武王駢牛一王命周公後

春秋傳曰成王定鼎于郊鄠卜世三十卜年七百京

璠曰郊山名鄠邑名史記曰太史公曰學者皆稱周伐紂居雒邑綜其實

不然武王營之成王使召公卜居居九鼎焉而周復

都豐鎬至犬戎叛幽王周乃東徙于雒邑

平王東遷居雒邑

史記曰平王立遷于維邑辟戎寇

詩譜曰王城者周東都土城畿內方六百里之地其封域在禹貢豫州太華外方之間北得河陽漸冀州之南始武王作邑于鎬京謂之宗周是為西都周公攝政五年成王在豐欲宅洛邑使召公先相宅既成謂之王城是為東都今河南是也召公既相宅周公往營成周今洛陽是也成王居洛邑遷殷頑民于成周復還歸處西都至于夷厲政教尤衰十一世幽王嬖褒似生伯服廢申后太子宜臼奔申申侯與犬戎攻宗周殺幽王于戲晉文侯鄭武公迎宜臼于申而立之是為平王以亂故徙居東都王城

括地志曰故王地本邾鄆周公新築在洛州河南縣北九里苑內東北隅自平王以下十二王皆都此城

至敬王乃遷都成周至赧王又居王城也

詳見卷五

秦孝公都咸陽

在今陝西西安府咸陽縣東二十里

史記曰秦之先中潏保西垂非子居犬邱

正義曰地理志云扶

風槐里縣周曰犬邱懿王都之秦更名廢邱高祖三年更名槐里

封邑于秦徐廣曰今天水

隴西縣

莊公復居犬邱文公元年居西垂宮四年居

汧渭之會甯公徙居平陽

徐廣曰鄆之平陽亭正義曰括地志云平陽故城在

岐州岐山縣西四十六里秦甯公徙都之處

德公居雍

正義曰括地志云

城獻公居櫟陽

徐廣曰今

孝公十二年作為咸陽

正義

曰括地志云咸陽故城亦名渭城在雍州咸陽縣即孝公徙都之處

築冀闕徙都之秦

徙八

漢高帝初王漢中今陝西漢中府南鄭縣

二年冬十一月都櫟陽今陝西西安府臨潼縣東北櫟陽鎮

五年春二月甲午即皇帝位于汜水之陽乃西幸洛陽

因成卒婁敬之說即日車駕西都關中

史記劉敬傳曰成卒婁敬求見說上曰陛下都洛陽

豈欲與周室比隆哉上曰然敬曰陛下取天下與周

室異周之先自后稷堯封之邠積德絜善十有餘世

公劉避桀居豳太王以狄伐故去豳杖馬箠居岐師古

日箠馬策也杖謂拄之也云周人爭隨之及文王為

西伯斷虞芮之訟始受命呂望伯夷自海濱來歸之

武王伐紂不期而會孟津之上八百諸侯皆曰紂可

伐矣遂滅殷成王即位周公之屬傅相焉乃營成周

洛邑以此為天下之中也諸侯四方納貢職道里均

矣有德則易以王無德則易以亡凡居此者欲令周

務以德致人不欲依阻險合後世驕奢以虐民也故

周之盛時天下和洽四夷鄉風慕義懷德附離而並

事天子不屯一卒不戰一士莫不賓服効其貢職及

周之衰也分而為兩師古曰謂東周君西周君天下莫朝周不能

制也非其德薄也而形勢弱也今陛下起豐沛收卒

三千人以此徑往而卷蜀漢定三秦與項羽戰滎陽

爭成皋之口大戰七十小戰四十使天下之民肝腦

塗地父子暴骨中野不可勝數哭泣之聲未絕傷矣
 者未起而欲比隆于成康之時臣竊以為不侔也且
 夫秦地被山帶河四塞以為固卒然有急百萬之眾
 可具也因秦之故資甚美膏腴之地此所謂天府者
 也陛下入關而都之山東雖亂秦之故地可全而有
 也夫與人鬪不搯其亢拊其背未能全勝也張晏曰亢喉嚨
 也師古曰搯與扼同謂今陛下入關而都按秦之故
 拊持之也亢下郎反地此亦搯天下之亢而拊其背也高帝問羣臣皆山
 東人爭言周王數百年秦二世即亡不如都周上疑
 未能決及留侯明言入關便即日車駕西都關中東
 大事記曰婁敬所引有德易以王無德易以亡乃戰
 國陋儒之說于周秦形勢初未嘗攷也豐鎬本文武

成康之所都平王東遷始以封秦耳敬所言秦之形
 勢乃周之形勢秦漢之人多不學但據目見言之東
 遷以前全盛之周則識之者鮮矣

留侯世家曰劉敬說高帝都關中上疑之左右大臣
 皆山東人多勸上都洛陽東有成皋西有殽雒洛陽
 倍河向伊洛其固亦足恃留侯曰洛陽雖有此固其
 中小不過數百里田地薄四面受敵此非用武之國
 也夫關中左殽函右隴蜀沃野千里南有巴蜀之饒
 北有胡苑之利索隱曰崔浩云苑馬牧外接胡地馬生于胡故云胡苑之利阻三
 面而固守獨以一面東制諸侯諸侯安定河渭漕挽
 天下西給京師諸侯有變順流而下足以委輸此所
 謂金城千里天府之國也劉敬說是也于是高帝即

日車駕西都關中

七月春二月自櫟陽徙都長安

地理志長安縣高帝五年置長安本鄉名盧縮

封長安侯今陝西西安府長安縣西故城是也

史記高祖本紀曰上擊韓王信還至長安蕭何治未

央宮立東闕北闕前殿太倉

師古曰未央殿雖南嚮而上書奏事謁見之徒

皆詣北闕公車司馬亦在北焉是則以北闕為正門而又有東門東闕至于西南兩面無門闕矣蓋蕭何初立未央宮以厭勝之術理宜然乎上見其壯麗甚怒謂何曰天下匈

匈勞苦數歲成敗未可知是何治宮室過度也何曰

天下方未定故可因以就宮室且夫天子以四海為

家非令壯麗亡以重威且亡令後世有以加也上悅

自櫟陽徙都長安

自櫟陽徙都長安

惠帝元年春正月城長安

三年春發長安六百里內男女十四萬六千人城長安

三十日罷 夏六月發諸侯王列侯徒隸二萬人城長

安

五年春正月復發長安六百里男女十四萬五千人城

長安三十日罷秋九月長安城成

此據漢書孝惠本紀文按史記呂后本紀

日三年方築長安城四年就半五年六年成就此云五年九月成小異索隱引漢宮闕疏四年築東面五年築

面北

漢書翼奉傳曰元帝時奉為中郎上延問以得失奉

以為祭天地于雲陽汾陰及諸寢廟不以親疏迭毀

皆煩費違古制又宮室苑囿奢泰難供以故民困國

虛亡累年之畜所繇來久不改其本難以末正迺上
疏曰臣聞昔者盤庚改邑以興殷道聖人美之竊聞
漢德隆盛在于孝文皇帝躬行節儉外省繇役其時
未有甘泉建章及上林中諸離宮館也未央宮又無
高門武臺麒麟鳳凰白虎玉堂金華之殿獨有前殿
曲臺漸臺宣室溫室承明耳孝文欲作一臺度用百
金度大重民之財廢而不為其積土基至今猶存師
日今在新豐縣又下遺詔不起山墳故其時天下大
和百姓治足德流後嗣如令處于當今因此制度必
不成功功名天道有常王道亡常亡常者所以應有
常也必有非常之主然後能立非常之功臣願陛下

徙都成周左據成皋右阻澠池前鄉崧高鄉嚮後介

大河建滎陽扶河東南北千里以為關而入敖倉地

方百里者八九東厭諸侯之權厭壓西遠羌胡之難

遠于陛下其已無為其恭按成周之居兼盤庚之德

萬歲之後長為高宗漢家郊兆寢廟祭祀之禮多不

應古臣奉誠難直居而改作如滎曰欲徙都乃可更

但但居謂故願陛下遷都正本衆制皆定亡復繕始

宮館不急之費歲可餘一年之畜今東方連年饑饉

加之以疾疫百姓菜色師古曰人專菜故肌或至相

食地比震動師古曰天氣溷濁日光侵奪執國政者

豈可不懷怵惕而戒萬分之一乎言當防意臣願陛

下因天變而徙都所謂與天下更始者也天道終而復始窮則反本故能延長而亡窮也今漢道未終陛下本而始之下以永始延祚不亦優乎如因丙子之孟夏順太陰以東行張晏曰如今因丙子之四月也太陰是時在甲戌常轉在乙亥丙子左到後七年之明歲必有五年之餘蓄然後大旋之也禮行考室之禮李奇曰凡宮新成殺牲以釁祭致其五祀之神謂之考室師古曰考成也成其禮也雖周之盛隆亡以加此惟陛下留神詳察萬世之策書奏天子異其意答曰問奉命園廟有七云東徙狀何如奉對曰昔成王徙雒盤庚遷殷其所避就皆陛下所明知也非有聖明不能一變天下之道臣奉愚慙狂惑惟陛下裁赦

王莽傳曰更始都長安居長樂官府藏完具獨未央宮燒更始至歲餘政教不行明年夏赤眉樊崇等眾數十萬人入關立劉盆子稱尊號攻更始更始降之赤眉遂燒長安宮室市里害更始民饑餓相食死者數十萬長安為虛墟墟城中無人行宗廟園陵皆發掘惟霸陵杜陵完六月世祖即位然後宗廟社稷復立天下艾安艾又同

光武建武元年夏六月己未即皇帝位于鄴南冬十月癸丑車駕入雒陽遂定都焉

後漢書杜篤但曰篤以關中表裏山河先帝舊京不宜改營雒邑廼上奏論都賦

杜篤論都賦曰皇帝以建武十八年巡于西嶽行至
長安明年有詔復函谷關作大駕宮六玉邸高車廡
于長安修理東都城門橋涇渭

王景傳曰先是杜篤奏上論遷都欲令車駕遷還長
安者老聞者皆動懷土之心莫不眷然佇立西望景

以宮廟已立恐人情疑惑會時有神雀諸瑞

章帝時有神雀

鳳凰白鹿白鳥等瑞乃作金人論頌維邑之美天人之符

獻帝初平元年春二月丁亥遷都長安

後漢書楊彪傳曰關東兵起董卓懼欲遷都以違其

難也違避乃大會公卿議曰高祖都關中十有一世光

武宮雒陽于今亦十世矣按石包識宜徙都長安以

應天人之意百官無敢言者彪曰移都改制天下大

事故盤庚五遷殷民胥怨昔關中遭王莽變亂宮室

焚蕩民庶塗炭百不一在光武受命更都雒邑今天

下無虞百姓樂安明公建立聖主光隆漢祚無故捐

宗廟棄園陵恐百姓驚動必有糜沸之亂

如糜沸之亂石

包識妖邪之書豈可信用卓曰關中肥饒故秦得并

吞六國且隴右材木自出致之甚易又杜陵南山下

有武帝故瓦陶竈數千所并功營之可使一朝而辦

百姓何足與議若有前却我以大兵驅之可令誨滄

海彪曰天下動之至易安之甚難惟明公慮焉卓作

色曰公欲沮國計邪太尉黃琬曰此國之事楊之言

得無可思卓不答司空荀爽見卓意壯恐害彪等因從容言曰相國豈樂此邪山東兵起非一日可禁故當遷以圖之此秦漢之執也卓意小解議罷卓使司隸校尉宣播以災異奏免琬彪等

三月乙巳車駕入長安幸未央宮

後漢書董卓傳曰初長安遭赤眉之亂宮室營寺焚滅無餘是時唯有高廟京兆府舍遂使時幸焉後移未央宮

蔡邕集有高廟祝嘏辭曰嗣曾孫皇帝某敢昭告于皇祖高皇帝各以后配昔受命京師都于長安國享十有一世歷年二百一十載遭王莽之亂宗廟隳壞

世祖復帝祚遷都雒陽以服中土享一十一世歷年一百六十五載予末小子遭家不造早統鴻業奉嗣無疆關東吏民敢行稱亂總連州縣擁兵聚眾以圖叛逆震驚王師命將征服股肱大臣推皇天之命以已行之事遷都舊京昔周德缺而斯干作應運變通自古有之于是乃以二月丁亥來自雒越三月乙巳至于長安勅躬不慎寢疾旬日賴祖宗之靈以獲有瘳吉旦齋宿敢用潔牲一元大武柔毛剛鬣商祭明視籘合嘉蔬香蕘鹹饗豐本明粢醴酒用告遷來尙饗又有九祝辭曰高皇帝使工祝承致多福無疆于爾嗣曾孫皇帝使爾受祿于天宜此舊都萬國和同

兆民康父眉壽萬年子子孫孫永守民庶勿替引之
興平二年秋七月車駕東歸

建安元年秋七月甲子車駕至雒陽

後漢書本紀曰車駕至雒陽幸故中常侍趙忠宅八月辛丑幸南宮楊安殿是時宮室燒盡百官披荆棘依牆壁間州郡各擁強兵而委輸不至羣僚饑乏尙書郎以下自出採稻音呂埤蒼曰或饑死牆壁間或為兵士所殺

八月庚申遷都許今河南開封府許州

魏文帝黃初元年冬十二月初營洛陽宮戊午幸洛陽二年春正月改長安譙今鳳陽府亳州許昌是年正月改許昌縣為許昌縣鄴

今河南彰德府臨漳縣西二十里洛陽為五都

水經注曰魏因漢祚復都洛陽以譙為先人本國許昌為漢之所居長安為西京之遺跡鄴為王業之本基故號五都

魏畧曰立石表西界宜陽北循太行東北界陽平南循魯陽東畧鄴為中都之地今天下民聽內徙復五年

其時三國鼎立季漢昭烈帝都成都今四川成都府吳大帝都

建業今南京應天府

晉武帝泰始元年冬十二月受魏禪都洛陽

惠帝永興元年冬十一月河間王顥使其將張方劫帝

幸長安以征西府為宮

光熙元年夏六月帝還洛陽

懷帝永嘉五年夏六月劉曜王彌寇洛陽帝蒙塵于平陽

晉書本紀曰東海王越之出也使河南尹潘滔居守大將軍苟晞表遷都倉垣帝將從之諸大臣畏滔不敢奉詔且宮中及黃門戀資財不欲出至是饑甚人相食百官流亡者十八九帝召羣臣會議將行而警衛不備帝撫手嘆曰如何曾無車輿乃使司徒傅祗出詣河陰修理舟楫為水行之備朝士數十人導從帝出步西掖門至銅駝街為盜所掠不得進而還

愍帝建興元年夏四月壬申即皇帝位于長安

四年秋八月劉曜寇長安冬十一月帝蒙塵于平陽

元帝太興元年春三月丙辰即皇帝位于建康愍帝建興元年

改建業為建康

晉書皇導傳曰蘇峻既平宗廟宮室並為灰燼溫嶠

議遷都豫章三吳之豪請都會稽二論紛紜未有所

適導曰建康古之金陵舊為帝里又孫仲謀劉玄德

俱言王者之宅古之帝王不以豐儉移都苟宏衛文

宋大帛之風則無往不可若不績其麻則樂土為墟矣

晉且北寇游魂伺我之隙一旦示弱竄于蠻越求之望

實懼非良計今特宜鎮之以靜羣情自安由是嶠等

謀並不行情

晉禪于宋

宋禪于齊

齊禪于梁

梁禪于陳五代皆都建康及陳後主而隋滅之

魏始居匈奴之故地至力微

追諡神元皇帝

乃遷于定襄之盛

樂

五傳至猗盧

追諡穆皇帝

乃城成樂以為北都修故平城以

為南都登平城西山觀望地勢乃更南百里于灑水之

陽黃瓜堆築新平城晉人謂之小平城

四傳至賀偃

追諡惠皇帝

築城于東木根山徙都之

紇那

追諡煬皇帝

遷于大甯

醫槐

追諡烈皇帝

城新盛樂

在故城東南十里

什翼犍

追諡昭成皇帝

移都于雲中之盛樂宮其孫珽始即皇

帝位是為太祖

癸酉七月十一日依舊鈔本校於香山無量殿訂正刪改

凡七十八字

藏園居士記

光緒歲在著雍困敦春月吳縣朱記榮槐廬家塾校刊
歷代帝王宅京記卷一終

歷代帝王宅京記卷一終 槐廬叢書

崑山顧炎武著 吳縣朱記榮校刊

總序下

天興元年秋七月遷都平城始營宮室建宗廟立社稷

八月詔有司正封畿制郊甸端徑術標道里

六年秋九月行幸南平城規度灑南面夏屋山背黃瓜

堆將建新邑

太宗泰常七年秋九月辛亥築平城外郭周回三十二

里

高祖太和十七年冬十月戊寅朔幸金墉城詔徵司空

穆亮與尚書李冲將作大匠董爵經始洛京

十八年春正月乙亥幸洛陽西宮閏二月壬申帝還至平城癸酉臨朝堂部分遷留十一月己丑車駕至于洛陽

十九年秋八月金墉宮成九月車駕幸金墉宮庚午六宮及文武遷于洛陽

六魏書在城王澄傳曰高祖外示南討意在謀遷齋于明堂左个詔太常卿王謚親令龜卜易筮南伐之事其兆遇革高祖曰此是湯武革命順天應人之卦也羣臣莫敢言澄進曰易言革者更也將欲順天應人革君臣之命湯武得之爲吉陛下帝有天下重光累葉今日卜征乃是伐叛不得云革命未可全爲吉也

高祖厲聲曰象云大人虎變何言不吉也澄曰陛下龍興旣久豈可方同虎變高祖勃然作色曰社稷我之社稷任城欲沮眾邪澄曰社稷誠知陛下之社稷然臣是社稷之臣豫參顧問敢盡愚衷高祖旣銳意必行惡澄此對久之乃解曰各言其志亦復何傷車駕還宮便召澄未及升階遙謂曰向者革卦今更欲論之明堂之忿懼衆人競言沮我大計故厲色怖文武耳想解朕意也乃獨謂澄曰今日之行誠知不易但國家興自北土徙居平城雖富有四海文軌未一此間用武之地非可文治移風易俗信爲甚難嶠函帝宅河洛王里因茲大舉光宅中原任城意以爲何

如澄曰伊洛中區均天下所據陛下制御華夏輯平九服蒼生聞此應當大慶高祖曰北人戀本忽聞將移能不驚擾澄曰此既非常之事當非常人所知唯須決之聖懷此輩亦何能為也高祖曰任城便是我之子房及駕幸洛陽定遷都之策詔曰遷移之旨必須訪眾當遣任城馳驛向代問彼百司論擇可否近日論革今真所謂革也王其勉之既至代都眾聞遷詔莫不驚駭澄援引古今徐以曉之眾乃開伏澄遂南馳還報會車駕于滑臺高祖大悅曰若非任城朕事業不得就也

李冲傳曰車駕南伐加冲輔國大將軍統眾翼從自

發都至于洛陽霖雨不霽仍詔六軍發軫高祖戎服執鞭御馬而出羣臣皆稽顙固諫高祖乃諭羣臣曰今者興動不小動而無成何以示後苟欲班師無以垂之于載朕仰惟遠祖世居幽漠違眾南遷以享無窮之美今若不南遷即當移都于此先宅土中王公等以為何如欲遷者左不欲者右安定王休等相居如右南安王楨進曰夫愚者闡于成事智者見于未明行至德者不議于俗成大功者不謀于眾非常之人乃能行非常之事廊神都以延王業度土中以制帝京周公啟之于前陛下行之于後固其宜也且天下至重莫若皇居請上安聖躬下慰民望光宅中原

輟彼南伐此臣等願言蒼生幸甚羣臣咸唱萬歲高祖初謀南遷恐衆心戀舊乃示爲大舉因以脅定羣情外名南伐其實遷也舊人懷土多所不願內憚南征無敢言者于是定都洛陽

東陽王丕傳曰高祖欲遷都臨太極殿引見留守之官大議乃詔丕等各陳其志燕州刺史穆羆進曰移都事大如臣愚見謂爲未可高祖曰卿便言不可之理羆曰北有獫狁之寇南有荆揚未賓西有吐谷渾之阻東有高句麗之難四方未平九區未定以此推之謂爲不可征伐之舉要須戎馬如其無馬事不可克高祖曰卿言無馬此理粗可馬出北方廐在此置

卿何慮無馬今代在恒山之北爲九州之外以是之故遷于中原羆曰臣聞黃帝都涿鹿以此言之古昔聖王不必悉居中原高祖曰黃帝以天下未定居于涿鹿旣庭之後亦遷于河南尙書于杲曰臣誠不識古事如聞百姓之言先皇建都于此無何欲移以爲不可中原數有篡奪自建邑平城以來與天地並固日月齊明臣雖管見膚淺終不以恒代之地而擬伊洛之美但安土重遷物之常性一旦南移懼不樂也不曰陛下去歲親御六軍討蕭氏至洛遣任城王澄宣旨敕臣等議都洛初奉恩旨心情惶越凡欲遷移當訊之卜筮審定吉否然後可高祖曰往在鄴中司

徒公誕咸陽王禧尙書李冲等皆欲請龜占吉凶朕謂誕等曰昔周召卜宅伊雒乃識至兆今無若斯之人卜亦無益然卜者所以決疑此既不疑何須卜也昔軒轅卜兆龜焦卜者請訪諸賢哲軒轅乃問天老天老謂爲善遂從其言終致昌吉然則至人之量未然審于龜矣朕旣以四海爲家或南或北遲速無常南移之民朕自多積倉儲不令窘乏丕曰臣仰奉慈詔不勝喜舞高祖詔羣官曰昔平文皇帝弃背率土昭成營居盛樂太祖道武皇帝神武應天遷居平城朕雖虛寡幸屬勝殘之運故移宅中原肇成皇宇卿等當奉先君令德光迹洪規前懷州刺史青龍前秦

州刺史呂受恩等仍守愚固帝皆撫而答之辭屈而退

孝武帝永熙三年秋七月丁未出奔長安己酉高歡入洛冬十月丙寅立清河王世子善見爲帝丙子北遷于鄴

又魏書孝靜帝本紀曰是月壬申詔曰安安能遷自古西之明典所居靡定往昔之成規是以殷遷八城周卜東三地吉凶有數隆替無恒事由于變適理出于不得已故也高祖孝文皇帝式觀乾象俯協人謀發自武州來幸嵩縣魏雖舊國其命惟新及正光之際國步孔棘喪亂不已寇賊交侵俾我生民無所措手今遠

遵古式深驗時事考龜襲吉遷宅漳滏庶克隆洪基
再昌寶麻主者明為條格及時發邁

自是分為東西魏

東魏禪于齊都鄴

西魏禪于周都長安

及周武帝滅齊宣帝大象元年以洛陽為東京

周禪于隋

隋文帝開皇二年夏六月丙申作新都于龍首山

在漢故城

東南十三里即今陝西西安府

隋書高祖本紀曰詔曰朕祇奉土元君臨萬國屬生
人之敝處前代之宮常以為作之者勞居之者逸改

創之事心未遑也而王公大臣陳謀獻策咸云義農

以降至于姬劉有當代而屢遷無革命而不徙曹馬

之後時見因循乃末代之晏安非往聖之宏義此城

從漢彫殘日久屢為戰場舊經喪亂今之宮室事近

權宜又非謀筮從龜占星揆日不足建皇王之邑合

大眾所聚論變通之數稽幽顯之符同心固請辭情

深切然則京師百官之府四海歸嚮非朕一人之所

獨有苟利于物其可違乎且殷之五遷恐人盡死

盤庚

篇曰重我民無盡劉是則以吉凶之土制長短之命謀新去故

如農望秋雖則劬勞其究安宅今區宇甯一陰陽順

序安安以遷勿懷怨胥龍首山川原秀麗卉物滋阜

卜食相土宜建都邑定鼎之基永固無窮之業在斯
公私府宅規模遠近營構資費隨事條奏乃詔左僕
射高頌將作大匠劉龍鉅鹿郡公賀婁子幹太府少
卿高龍义等創造新都

庾季才傳曰高祖將遷都夜與高頌蘇威二人定議
季才且而奏曰臣仰觀元象俯察圖記必有遷都之
事且漢營此城經今將八百歲水皆鹹鹵不甚宜人
願陛下協天人之心為遷徙之計高祖愕然謂頌曰
是何神也遂發詔施行

李穆傳曰上素嫌臺城制度狹小又宮內鬼祿蘇威
嘗勸其遷都未決適太史奏狀及穆上表諸改都邑

上曰天道聰明已有徵應太師民望復抗此請是則
可矣遂從之

冬十二月丙子名新都曰大興城

三年春三月丙辰遷于新都

煬帝大業元年春三月丁未營洛陽為東京

五年春正月丙子改東京為東都

九年春三月丁丑發丁男十萬城大興

唐高祖受隋禪都長安

新唐書突厥傳曰突厥既歲盜邊或說帝曰虜數內

寇者以府庫子女所在我能去長安則戒心止矣帝

使中書侍郎宇文士及踰南山按行樊鄧將徙都焉

羣臣贊遷秦王獨曰夷狄自古為中國患未聞周漢為遷也願假數年請取可汗以報帝乃止

高祖永徽五年冬十月和雇雍州四萬一千人築長安外郭三旬而畢

顯慶二年冬十二月丁卯以洛陽宮為東都

武后光宅元年秋九月甲寅改東都為神都

資治通鑑曰初隋煬帝作東都無外城僅有短垣而

已武后長壽元年鳳閣侍郎李昭德始築之

長壽元年秋九月癸卯以并州為北都

通典曰武后長壽元年以并州后之故里改為北都

中宗神龍元年春二月甲寅復以神都為東都北都為

并州

元宗開元九年春正月丙辰以蒲州為河中府置中都

夏六月己卯罷中都

舊唐書作秋七月戊申

通典時揚州功曹參軍麗正殿學士韓覃上疏曰臣

聞禮記月令曰孟夏之月無起土功無聚大眾昔魯

夏城中邱春秋書之垂為後戒今建國都乃長久之

大業也犯天地之大禁襲春秋之所書奪人盛農之

時愚臣竊以為甚不可也至若兩都舊制分官眾多

費耗用度尚以為損豈可更建中都乎夫河東國之

股肱郡也勁銳強兵盡出于是其地隘狹今又置都

使十萬之戶將安投乎且陋東都而幸西都自西都

而造中都取樂一君之欲以遺萬人之患務在都國之多不恤危亡之變悅在遊幸之麗不顧兆庶之困非所以深根固蒂不拔之長策矣昔漢帝感鍾離之言息事德陽之殿趙主採續咸之諫止造鄴都之宮臣愚誠願下明詔罷中都則獲福無疆天下幸甚六月三日詔停
十一年春正月辛卯以并州為太原府置北都
六典曰京兆河南太原為三都
十八年夏四月乙卯築西京外郭凡十月而功畢
肅宗至德二載冬十二月戊午朔以蜀都為南京鳳翔郡為西京西京為中京

上元元年秋九月甲午以荊州為江陵府置南都復以南京為蜀郡

二年秋九月壬寅罷京兆河南太原鳳翔四京及江陵南都之號

元年去年號稱元年其建卯月辛亥朔復以京兆府為

上都河南府為東都鳳翔府為西都江陵府為南都太原府為北都

新唐書呂諲傳曰為荊州刺史澧朗岐忠等五州節度使建請荊州置南郡詔可于是更號江陵府以諲為尹置永平軍萬人遏吳蜀之衝以河南之岳潭柘道邵連黔中之涪凡七州隸其道

舊唐書郭子儀傳曰自西蕃入寇車駕東幸廣德元年十月

吐蕃犯京畿上幸陝州程元振勸帝且都洛陽以避蕃寇代宗

然之下詔有日子儀聞之附章論奏曰臣聞雍州之

地古稱天府右控隴蜀左扼嶠函前有終南太華之

險後有清渭濁河之固神明之奧王者所都地方數

千里帶甲十餘萬兵強士勇雄視八方有利則出攻

無利則入守此用武之國非諸夏所同秦漢因之卒

成帝業其後或處之而秦去之而亡前史所書不唯

一姓及隋氏季末煬帝南遷河洛邱墟兵戈亂起高

祖唱義亦先入關惟能翦滅姦雄底定區宇以至于

太宗高宗之盛中宗元宗之明多在秦川鮮居東洛

問者羯胡構亂九服分離河北河南盡從逆命然而

先帝仗朔方之衆慶緒奔亡陛下藉西土之師朝義

就戮豈惟天道助順抑亦地形使然此陛下所知非

臣飾說近因吐蕃陵逼鑿駕東巡蓋以六軍之兵素

非精練皆市肆屠沽之人務挂虛名苟避征賦及驅

以就戰百無一堪亦有潛輸貨財因以求免又中官

掩蔽庶政多荒遂令陛下振蕩不安退居陝服斯蓋

關於委任失所豈可謂秦地非良者哉今道路云云

不知信否咸謂陛下已有成命將幸洛都臣熟思其

端未見其利夫以東周之地久陷賊中宮室焚燒十

不存一百曹荒廢曾無尺椽中間畿內不滿千戶井

邑榛棘豺狼所嗥既乏軍儲又鮮人力東至鄭汴達于徐方北自覃懷經于相土人烟繼絕千里蕭條將何以奉萬乘之牲餼供百官之次舍矧其土地陝阨纔數百里間東有成皋南有二室險不足恃適為戰場陛下奈何棄久安之勢從至危之策忽社稷之計生天下之心臣雖至愚竊為陛下不取且聖旨所慮豈不以京畿新遭剽掠田野空虛恐稍食不充國用有闕以臣所見深謂不然昔衛文公小國之君諸侯之主耳遭懿公為狄所滅始廬于曹衣大布之衣冠大帛之冠元年革車三十乘季年三百乘卒能恢復舊業享無疆之休況明明天子躬儉節用苟能黜素

餐之吏去冗食之官抑豎刁易牙之權任蘧瑗史鮪之直薄征弛力卹隱造鰥委諸相以簡賢任能付老臣以練兵禦侮則黎元自理寇盜自平中興之功旬月可冀卜年之期永永無極矣願時邁順動迴鑾上都再造邦家維新庶政奉宗廟以脩薦享謁陵寢以崇孝思臣雖隕越死無所恨代宗省表垂泣謂左右曰子儀用心真社稷臣也可亟還京師十一月車駕自陝還宮

元載傳曰扈駕自陝還上表請以河中府為中都秋杪行幸春首還京以避蕃戎侵軼之患帝初納之遣條奏以聞載遂抗表請建中都以關輔河東等十州

戶稅入奉京師創置精兵五萬管在中都以威四方
疏入不報
杜佑通典議曰關中寓內西偏天下勞于轉輸雒陽
宮室正在上中周漢以還多為安宅皇輿巡幸之處
則是國都何必重難遷移密邇劫寇擇才留鎮以息
人力自然無慮答曰古今既異形勢亦殊當周之興
也雖定鼎郊鄩而王在鎬京幽王之亂平王東遷始
則晉鄭夾輔中乃齊晉主盟咸率諸侯共尊王室猶
有請隧之僭中肩之師東漢再興巨寇皆殄魏晉以
下理少亂多今咸秦陵廟在焉勝兵計數十萬海內
財力雲奔風趨儻議遷都得非蹙國斯乃示弱天下

何以統臨四方雒陽地瘠彫弊尤甚萬乘所止千官
畢臻樵牧難資藁秸難瞻又無百二之固慮啟姦兇
之心豈得舍安而就危棄大而從小也漢高初平項
羽將宅雒師婁敬請居關中張良贊成其計田肯稱
賀方策備存武德中突厥牙帳在于河曲數十萬騎
將過原州時以傷夷未平才力且乏百辟震恐皆請
遷都山南太宗獻計固爭方止永安宗社實賴聖謨
議者又曰雒陽四戰之地既將不可蒲坂虞舜舊國
表裏山河江陵亦嘗設都控壓吳蜀甯不堪居答曰
蒲坂土瘠民貧困竭甚于雒邑江陵本非要害梁主
數歲國亡夫臨制萬國尤惜大勢秦川是天下之上

腴關中爲海內之雄地巨唐受命本在于茲若居之則勢大而威遠舍之則勢小而威近恐人心因斯而搖未可輕議

僖昭之時乘輿屢出

舊唐書僖宗紀曰光啟元年十二月沙陀逼京師田令孜奉帝出幸鳳翔初黃巢據京師九衢三內宮室宛然及諸道平破賊爭貨相攻縱火宮室居市閭里十焚六七賊平之後令京兆尹王徽補葺至是亂兵復焚宮闕蕭條鞠爲茂草矣

新唐書朱朴傳曰昭宗時朴爲國子博士上書議遷都曰古王者不常厥居皆觀天地興衰隨時制事關

中隋家所都我實因之凡三百歲文物資貨奢侈僭僞皆極焉廣明巨盜陷覆宮闕局署帑藏里閭井肆所存十二比幸石門華陰十二之中又亡八九高祖太宗之制蕩然矣夫襄鄧之西夷漫數百里其東漢輿鳳林爲之關南菊潭環屈而流屬于漢西有上洛重山之險北有白崖聯絡乃形勝之地沃衍之虛若廣浚漕渠運天下之財可使大集自古中興之君去已衰之衰就末王而王今之南陽漢光武雖起而未王也臣視山河壯麗處多故都已盛而衰難可興已江南土薄水淺人心囂浮輕巧不可以都河北土厚水深人心疆懷狠戾不可以都唯襄鄧實居中原人

心質良去秦咫尺而有上洛爲之限永無夷狄侵軼之虞此建都之極選也不報

趙匡凝傳曰匡凝爲山東道南節度使天祐元年封楚王時諸道不上供惟匡凝歲貢賦天子又曰昭宗嘗有意都襄陽依匡凝以自全

昭宗天祐元年春正月壬戌朱全忠逼帝幸東都夏閏四月甲辰東駕至東都

舊唐書昭宗紀曰乾甯四年七月丙申上幸華州九月己卯溯汴州朱全忠河南尹張全義與關東諸侯俱上表言秦中有災請車駕遷都諸侯全都全義言臣已表率諸藩繕治洛陽宮室優詔答之天祐元年

正月己酉全忠率師屯河中遣牙將寇彥卿奉表請車駕遷都洛陽全忠令長安居人按籍遷居徹屋木自渭浮河而下連費號哭月餘不息秦人大罵于路曰國賊崔胤召朱溫傾覆社稷俾我如此天平天平丁巳車駕發京師癸亥發陝州閏四月丁酉車駕發陝州甲辰至東都由徽安門入是日大風雨跬步不辨物色日暝少止上謁太廟禮畢還宮御正殿宣勞從官衛士受賀乙巳上御光正門大赦制曰乃睠中州便侯伯會朝之路運逢百六順古今禳避之宜况建鼎舊京我家二宅輾轅通其左郊鄩引其前周平王之東遷更延姬姓漢光武之定業克茂劉宗肇葺

新都祈天永命皆因否運復啟昌期或西避于戎狄
或載殲于妖孽朕遭家不造布德不明十載以來三
罹播越亦屬災纏秦雍叛逆起邠岐始幸石門以避
衛兵之亂載遷華嶽仍驚畿邑之侵憂危則矢及車
輿陵脅則火延宮廟迨至逆連宮豎構結姦兇致劉
季述幽朕于下宮韓全誨劫予于右輔莫非兵圍內
殿焰瓦九重皆思假武以容身唯効指鹿而威眾矯
宣天憲欺蔑外藩行書詔以任情欲忠良而獲罪雖
羣方岳牧協力匡扶拘戎律于阻修報朝恩而隔越
副元帥梁王全忠以兼鎮近輔總兵四藩遠赴岐陽
躬迎大駕辛勤百戰盡勦兇渠營對三年竟迴鑾輅

咸鎬載新其宮闕讓珪絕類于闡徒方崇再造之功
以正中興之運又邠岐結釁巴蜀連兵上負國恩下
隳鄰好焚宮烈火更延燕于邠鄰却駕兇鋒復延侵
于禁苑又太一遊處併集六宮罰星熒惑久纏東井
元象薦災于秦分地形無過于洛陽爰有一二蓋臣
洎四方同志竭心王室共誓嘉謀魏鎮定燕航大河
而畢至陳徐潞蔡輦巨軸以偕來披荆棘而立朝廷
剗灰燼而化輪奐左郊祧而右社稷肅爾崇嚴前廣
殿而後重廊藹然華邃公卿僉議龜筮協從甲子令
年孟夏初吉備法駕而離分陝列百官而入洛郊觀
此殿繁良多嘉慰謝罪太廟憂惕驚懷登御瑞門軫

惻興感蓋以一人寡祐致萬姓靡甯工役艱疲忠良盡瘁克建再遷之業冀延八百之基宜覃渙汗之恩俟此雍熙之慶滌瑕盪垢咸與維新可大赦天下改天復四年爲天祐元年於戲肆青閭闔卽安宮闈雖九廟几筵已闕于新室而諸陵松柏遙隔于舊都將務父甯難申綣慕文武百辟執事具僚從我千里而來端爾一心莅政恩覃既往効責從新方當開國之初必舉慢官之罰

五代史寇彥卿傳曰初太祖

朱全忠僞號梁太祖

與崔胤謀欲

遷都洛陽而昭宗不許其後昭宗奔于鳳翔太祖以兵圍之昭宗既出明年太祖以兵至河中遣彥卿奉

表迫請遷都彥卿因悉驅徙長安居人以東人皆拆屋爲椳浮渭而下道路號哭仰天大罵曰國賊崔胤朱溫使我至此昭宗亦顧瞻陵廟傍徨不忍去謂其左右爲俚語云紇于山頭凍死雀何不飛去生處樂相與泣下沾襟

資治通鑑曰正月丁巳上御延喜樓朱全忠遣牙將寇彥卿奉表稱邠岐兵逼畿甸請上遷都洛陽及下東樓裴樞已得全忠移書促百官東行戊午驅徙士民號哭滿路老幼縋屬月餘不絕壬戌車駕發長安全忠以其將張延範爲御營使毀長安宮室百司及民間廬舍取其材浮渭沿河而下長安自此遂邱墟矣

梁太祖開平元年夏四月戊辰以汴州為開封府建東
都以唐東都為西都廢西京為雍州佑國軍
後唐莊宗同光元年夏四月己巳以魏州為興唐府建
東京太原府建西京以鎮州為真定府建北都冬十
一月乙巳罷北都為鎮州成德軍以太原為北都丙
辰復汴州為宣武軍丁酉復西京京兆府
三年春三月辛酉改東京為鄴都以洛陽為東都
明宗大成四年夏六月戊申罷鄴都
晉高祖天福三年冬十月庚辰復以汴州為東京洛陽
為西京以西京為雍州晉昌軍十一月辛亥復鄴都
周高祖顯德元年春正月戊寅罷鄴都

世宗顯德三年春正月戊戌發開封府曹滑鄭州民十
餘萬築大梁外城

宋太祖受周禪都東京
開寶元年春正月甲午增治京都
王應麟地理通釋曰太祖生于洛陽有遷都之意晉
王言非便太祖曰朕將西遷者欲據山河之固而去
冗兵王又言在德不在險太祖曰不出百年天下民
力殫矣

真宗景德二年春二月甲申以宋州為應天府
大中祥符七年春三月建應天府為南京
仁宗慶歷二年夏五月戊午建大名府為北京

宋史范仲淹傳曰時呂夷簡執政他日論建都之事
仲淹曰洛陽險固而汴為四戰之地太平宜居汴即
有事必居洛陽當漸廣儲蓄繕宮室帝問夷簡夷簡
曰此仲淹迂闊之論也仲淹乃為四論以獻

呂夷簡傳曰契丹聚兵幽薊聲言將入寇議者請城
洛陽夷簡謂契丹畏壯侮怯遠城洛陽亡以示威景
德之役非乘輿濟河則契丹未易服也宜建都大名
示將親征以伐其謀或曰此虛聲耳不若修洛陽夷
簡曰此子囊城郢計也使契丹得渡河雖高城深池
何可恃邪乃建北京

神宗熙甯八年秋八月發河北京東兵監牧卒修都城

徽宗政和六年春二月庚寅廣京城

高宗建炎元年夏五月庚寅朔即位于南京應天府

三年秋七月辛卯以杭州為臨安府

紹興元年冬十一月戊戌詔駐蹕臨安

二年春正月己未修臨安城

宋史陳亮傳曰淳熙五年亮詣闕上書曰夫吳蜀天
地之偏氣錢塘又吳之一隅當唐之衰錢鏐以閭巷
之雄起王其地自以不能獨立常朝事中國以為重
及我宋受命俶以其家入京師而自獻其土故錢塘
終始五代被兵最少而二百年之間人物日以繁盛
遂甲于東南及建炎紹興之間為六飛所駐之地當

時論者固已疑其不足以張形勢而事恢復矣秦檜
又從而滿百司庶府以講禮樂于其中其風俗固已
華靡士大夫又從而治園囿臺榭以樂其生于干戈
之餘上下晏安而錢塘爲樂國矣一隙之地本不足
以容萬乘而鎮壓且五十年山川之氣蓋亦發泄而
無餘矣故穀粟桑麻絲枲之利歲耗于一歲禽獸魚
鼈草木之生日微于一日而上下不以爲異也公卿
將相大抵多江浙閩蜀之人而人才亦日以凡下場
屋之士以十萬數而文墨小異已足以稱雄于其間
矣陛下據錢塘已耗之氣用閩浙日衰之士而欲鼓
東南習安脆弱之衆北向以爭中原臣是以知其難

也荆襄之地在春秋時楚用以虎視齊晉而齊晉不
能屈也及戰國之際獨能與秦爭帝其後三百餘年
而光武起于南陽同時其事往往多南陽故人又二
百餘年遂爲三國交據之地諸葛亮由此起輔先主
荆楚之士從之如雲而漢氏賴以復存于蜀周瑜魯
肅呂蒙陸遜陸抗鄧艾羊祜皆以其地顯名又百餘
年而晉氏南渡荆襄常雄于東南而東南往往倚以
爲疆梁竟以此代齊及其氣發泄無餘而隋唐以來
遂爲偏方下州五代之際高氏獨常臣事諸國本朝
二百年之間降爲荒落之邦北連許汝民居稀少土
產卑薄人才之能通姓名于上國者如晨星之相望

況至于建炎紹興之際羣盜出沒于其間其被禍尤
極以迄于今雖南北分畫交據往往又置于不足用
民食無所從出而兵不可由此而進議者或以爲憂
而不知其勢之足用也其地雖要爲偏方然未有偏
方之氣五六百年而不發泄者況其東通吳會西連
巴蜀南極湖湘北控關洛左右伸縮皆足以爲進取
之機今誠能開墾其地洗濯其人以發泄其氣而用
之使足以接關洛之氣則可以爭衡于中國矣是亦
形勢消長之常數也陛下慨然移都建業百司庶府
皆從草創軍國之儀皆從簡畧又作行宮于武昌以
示不敢甯居之意常以江淮之師爲金人侵軼之備

而精擇一人之沈鷺有謀開豁無他者委以荆襄之
任寬其文法聽其廢置撫摩振厲于三數年之間則
國家之勢成矣

遼初國號曰契丹居潢水之上名曰西樓
大祖神冊三年春二月癸亥城皇都

四年春二月丙寅修遼陽故城以漢民渤海戶實之改
爲東平郡

太宗天遷三年冬十二月升東平郡爲南京
會同元年冬十一月晉遣趙瑩奉表來賀以幽薊瀛莫
涿檀順媯儒新武雲應朔寰蔚十六州并圖籍來獻于
是詔以皇都爲上京府曰臨潢升幽州爲南京南京爲

東京以皇極為上京日謂黃代幽代為南京

聖宗統和二十五年春正月建中京即共圖錄末

興宗重熙十三年冬十一月丁卯改雲州為西京

金之先在混同江長白山至獻祖乃徙居海古水耕墾

樹藝始築室室有棟宇之制人呼其地為納葛里納葛

里者漢語居室也自此遂定居于按出虎水之側太祖

建國稱京師

熙宗天眷元年秋八月以京師為上京府日會甯舊上

京為北京

海陵天德三年春三月壬辰詔廣燕城建宮室夏四月

丙午詔遷都燕京

貞元元年春三月辛亥至燕京乙卯改燕京為中都府

日大興汴京為南京中京為北京

正隆二年秋八月甲寅罷上京留守司 冬十月壬寅

命會甯府毀舊宮殿諸大族宅及儲慶寺仍夷其址而

耕種之

金史海陵本紀日削上京之號止稱會甯府稱為國

中者以違制論

三年冬十月詔左丞相張浩參知政事敬嗣輝營建南

京宮室

六年夏六月癸亥至南京宣宗薨繼位日

世宗大定十三年秋七月庚子復以會甯府為上京

宣宗貞祐二年秋七月遷都南京以會稽郡為南京
 金史完顏訛可傳曰初宣宗議遷都朝臣謂可遷河
 中河中背負關陝五路士馬全盛南阻大河可建行
 臺以為右翼前有絳陽平陽太原三大鎮敵兵不
 輕入應三鎮郡縣之民皆聚之山寨敵至則為晝攻
 夜劫之計屯重軍中條則行在有萬全之固矣主議
 者以河中在河朔又無宮室不及汴梁議遂寢
 撤合輦傳曰宣宗改河南府為金昌府號中京又擬
 少室山頂為御營命移刺粘合築之
 元初國號曰蒙古太祖始即位于幹難河之源十五年
 建都和林

元史地理志曰和甯路始名和林以西有哈刺和林
 河因以名城

太祖十五年定河北諸郡建都于此前後五朝都焉

世祖以憲宗六年春三月命僧子聰後名劉秉忠卜地于桓

州東灤水北城開平府經營宮室

中統四年五月戊子陞開平府為上都

至元元年八月己卯改燕京為中京

四年春正月城中都始建宗廟宮室

九年春二月壬辰改中都為大都

元史劉秉忠傳曰初帝命秉忠相地于桓州東灤水
 北建城郭于龍岡三年而畢名曰開平繼升為上都

而以燕為中都四年又命秉忠築中都城始建宗廟
宮室八年奏建國號曰大元而以中都為大都
二十年夏六月丙申發軍完大都城

四年春五月賊中將張瑄宗瑄宗瑄
至武安入八月五日取海京中京
中遂開平正月九日開平城土味
限東界水北城四平開平城土味
七月十二日早起校畢訂正三十九字

光緒歲在著雍困敦春月吳縣朱記榮槐廬家塾校刊
歷代帝王宅京記卷二終

書